

سروش

۱۳۳۰

والله يهدي من يشاء الى صراط مستقيم دینی ، علمی ، ادبی ، سیاسی هفته‌لق بمجموعه اسلامیة در
اتبعون اهدکم سبیل الرشاد

صاحب و مدیر مسئول : ح . اشرف ادیب

بجرا ایلد مراقات نبی :

ابوطالب برای تجارت کاروان ایله شامه عزیمت ایتدکلی زمان اون ایکی یاشلرنده بولونان فخر عالم افندی می پک زیاده سودکلرندن یانندن آیرمایارق معیتلرینه آلدیلر ، شامه قریب بصرا دینلن موقعه نازل اولدیلر . چونکه اوراسی محل نزول کاروان ایدی . بورایه یاقین برصومعه وارایدی - نسطوریلر کلیسای اولق اوزره مرویدر - اوراده راهب بولونان بجرا ، انجیلده و سائر کتب مقدسه ده بیان ایدلدیکی جهته بریغمبر ذیشانک مبعوث اولاجغنی و او پیغمبرک حال و شانی و علامتلیغی ده بیلیددی .

حضرت فخر عالمک مبارک وجود سعادتلی کونشدن متأثر اولما . مق ایچون قبل النبوه باشلی اوزرنده بربولوط پارچه سی بولوندیغی ده مرویدر . [قبل النبوه اولان خارقه لره اصطلاح اهل سیرده (ارهاص) اطلاق اولونور .]

دائماً تدقیقاتده بولونان بجرا کاروانک ورودیله بعض خوارقک ظهورینی کورنجه مراق ایتدی ، او کاروانی ضیافته دعوت ایتدی ، اولرنده کیتدیلر ، حضرت پیغمبری اوفارق اولدقلی ایچون ضیافته آلامدیلر ، یوکلر ، دوه لر یاننده براقیدیلر . بجرا کوردی که مقصودی حاصل اولمادی ، کلن زواره سؤال ایتدی : — ارقداشلیکزدن باشقه کیسه قالدیمی ؟ ... — خیر ، دیدیلر ، یالکز کوچک بر چوقق یوکلر نزدنده قالمشدر ... هر حالده او طفل ناز کترکده بولونماسنی بحیراشدله رجا ایتیه سی اوزرینه ، حضرت پیغمبری ده کیدوب کتیردیلر ، برابر یمک ییدیلر . بجرا دائماً تدقیقاتده بولونیوردی : حضرت پیغمبر ناصل یمک ییور ، نه صورتله حرکت ایدیور ، هر حالنی نظر تدقیقندن کچیر- ییوردی . نهایت : — بوکیمک چوجغیدر ؟ دیه صوردی . ابوطالب : — بتم چوجغمدر . بجرا : — یوق ، دیدی ، بو بر دریتیم اولق یاقیشیر . اوزمان ابوطالب : — اوت برادر زاده مدر ، بتم یاننده بیودیکی ایچون او غلم دییورم ... جوابنده بولوندی . تخمینات و کشفیاتک هب موافق چیقدیغنی کورهن بجرا فخر عالمک کتف سعادتلرینه باقمق آرزوسنی اظهار ایله مساعدده طلبنده بولوندی ، مساعدده استحصالندن صوکر ارداد سعادتلرینی آچدی ، جناب پیغمبرک ایکی اوموزی آره سنده ککلک یورطه سی قدر برات بگنی - که مهر نبوتدر - کورنجه تلثم ایله یوزنی کوزنی سوردی و آغلامغه باشلادی ، اوراده کی خلق ، هپسی شاشیر- دیلر ، پاپاسک عنندنده محمدک نه قیمتی وار ، دیه تعجب ایتدیلر .

بجرا : — بعثتی انجیل شریفده قطعاً تصریح و تبشیر اولونان خاتم الانبیا بو طفل شریف اولاجقدر ، بو بشاثری علمای یهودده بیلیرلر ، شامده ایسه اولر هم چوق ، هم نفوذ لیدرلر ، ضرر ایراث ایتهلری احتمالی واردر . اموالکزی بوراده صاتیع کزده شامه کیمه یکنز ... دیه مسافرلرینه نصیحتده بولوندی . غایت صمیمانه اولان بونصیحت کاروان خلقنه ده تأثیر ایتدی ، حسن صورتله تلقی وقبول ایتدیلر ، مکیه دوندیلر ، بووقعه یی مکده اشاعه ایتدیلر ،

بووقعه همان هرکسک معلومی اولدی ، چونکه شامه کیشمک اوزره چیقان برکاروانک شامه کیمه دن کیری یه عودتلی خلاف عادت ایدی . هرکس سینی صوریور ، اولرنده آکلادیورلردی . (تعلم) نامیله هیچ برروایت موجود دکدر .

ملاقاتک بوصورتله جریانی حقنده بزم برچوق شواهدیمزموجوددر . انشاءالله کله جک مقاله مزده بولری تعداد ایدرز .

سلانیک اتحاد وترقی مکتبی علوم دینیہ معلمی

ح . محمد شوکت

فلسفه

اسلامده فن و فلسفه

مابعد

ابن جزله فطرة حساس ، نزه برشاعر ، فکر آ متبحر بر حکیم ایدی . بوتون مدت حیاتنده بشریتک آلامنه قارشى آغلامش ، فلاکت عمومیه دن روحاً حصه دار اولمشدر .

هم جفیندن برینک آلام واضطراباتنه دواساز ، بر بدبختک تهوین احتیاجاتنه موفق اولدیغنی زمانی حیاتک اک مسعود بر آنی کی تلقی ایدردی . طالعک مرحمتسز نجه لری آلتنده ایکله یین بیچاره لک امدادینه قوشار ، فلاکتلرینی تخفیفه چالیشور ، بو اوغورده مالاً ، بدنأ هیچ برفدا کاراقدن کیری قالمزدی .

خليفة مقتدی بامراللهک مظهر توجهی اولدیغنی کی طبابتده کی اختصاصی جهتیه ده پک زیاده شهرت قازاندىغندن بوسایه ده اولدجه مهم بر ثروت اکتساب ایلشدی .

فقط ابن جزله راحت کی ثروتی ، حتی حیاتی بشریته وقف ایتمش نجیب سیالردندر . خانه سی عادتاً بردار العجزه حالنده ایدی . نروده بیکس برخسته ، عاجز بر بدبخت طویارسه بالین فلاکتیه قوشار ، راحت وحضورنی براقیر ، او بیچاره نک تداویسنه قوییلور ، لازم کلن معالجانى کندی پاره سیله آلیر ، باشقه احتیاجلرینی ده تسویه ایدر ؛ منشرح وفخور بر قلب ، مستریخ وظفردار بروجدانله خانه سینه عودت ایدردی . مغدورینی نچه اعتسافدن تخلیصه چالیشیر ، مظلم ومجهول بر کرداب سفالته دوغری آتیلان بیکس ، یتیم چوجقلری طویلار ، جسماً ، روحاً تداویلرینه چالیشیر ، اوقوتدیرر واولره امیدبخش ونوشین براستقبال حاضرلاردی .

ابن جزله ، حیاتنده اولدیغنی کی بعدالماتده بشریته خدمت ایتک ایسته مش ، پک قیمتدار آثاری جامع اولان زنکین کتبخانه سنی ابوحنیفه جامعنه تبرع ایلشدر .

مشارالیه مشهور خطاطیندن اولدینی جهتله وقف ایتدیکی کتابلردن برچوغنی کندی الیه استنساخ ایلشدی .

ابن جزله پک چوق آثار تالیفه موفق اولمشدر. فهرست نویسر طرفندن (کتاب الاشارات فی تلخیص العبارات) و (رساله فی مدح الطب وموافقته الشرع) نامنده ایکی کتاب یازمش اولدینی بیان ایدیلورسده بونلرک محتویاتنه دأثر - مع التأسف - هیچ بر معلومات ویرلیور .

ابن جزله نك المشهور اثرلری (منهاج الیابان فیما یستعمله الانسان) عنوانلی تالیف کزینله (تقویم الابدان) نامنده کتاب شهریدر . تقویم الابدانک یازمه بر نسخه سی جزایرده قسطنطین کتبخانه سنده موجود اولدینی مستشرقینک جمله بیانلانددر .

منهاج الیابانده ، نباتات ، ادویه ومواد سائر طیه نك اسملری الفبا صره سیله درج ایدلمش وحذالرنده بونلره دأثر معلومات لازمه ویرلمشدر . منهاج عادتا طبی برانسیقلویه دیدر. کتاب ، بویوک صحیفه ده تقریباً اوچوز آتمش یاراقدن مرکب اولوب پارس کتبخانه سنده بر نسخه سی موجوددر .

منهاجک اولدقجه اوزون اولان مقدمه سنده مؤلف ادویه حقنده پک مهم معلومات عمومی ویردیکی کی کتابی تالیف ایدرکن نه کی اثرلره مراجعت اتمش اولدیغنی ده آریجه ذکر اتمشدر .

منهاجک اووقلرده یازلمش اولان آثار طیه نك کافه سنده فائق اولدینی مستشرقینک تحت اعترافندهدر .

منهاجک قیمت علمیه سی اثرک بالآخره مشهور ابن بیطار طرفندن تدقیق وتنقید ایدلمسندنده آکلاشیله بیلور .

ابن بیطار منهاجی باشدن نهایته قدر تدقیق ایدرک نقصان جهتلرینی اصلاح ایلشددر . منهاجک بر نسخه سی پارس کتبخانه سنده موجود اولوب (۱۰۲۱) نجی نومروده مقیددر .

ابن جزله نك (تقویم الابدان فی تدبیر الانسان) عنوانلی کتابی منهاجندن زیاده مشهور و قیمتداردر . تقویم الابدان ، علم الامراضه دأثر مباحث مهمه بی جامع قلاسیق برادرر .

شرقهده بویولده یازلمش آثار ایچون تقویم ، نمونه اتخاذا ایدلمشدر. ابوالفدا کی بر متبحر بیله (تقویم البلدان) نامنده کی جغرافیا کتابنده ابن جزله بی تقلیددن کندی آله مامشدر .

تقویم الابدانک بر نسخه سی پارس کتبخانه سنده موجود و (۱۰۲۴) نجی نومروده محفوظدر .

کتاب تقریباً ۳۵۲ صحیفه دن مرکب و قرق درت تابلوی محتویدر. هر تابلو ایکی صحیفه اشغال ایتمکدهدر. برنجی صحیفه ده مرضک اسمی ، مرضه دوچار اولان کیمسه نك مزاجنه کوره طرز تأثیری ، خسته نك سنی ، ویشادینی محیطک ایجاباتی ، مرضک موسم ظهوری ، خسته نك دوره وخامی ، اسباب وعلائمی ایضاح ایدلمش اولدینی کی خسته نك قارشى ایجاب ایدن تدابیر دخی کوسترلمشدر .

ایکنجی صحیفه ده ایسه علائم واعراضی برنجی صحیفه ده اراشه ایدیلن خسته نك طرز تداویمی بیان اولمشدر . صحیفه لرك ابتدالریله نهایتلرنده خسته نك لره دأثر معلومات عمومی ویرلمشدر .

تقویم الابدانده ایلك اول حما خسته نك لردن بحث ایدلمش ، بعده امراض جلدیهیه ، قره لره وسمومه دأثر معلومات لازمه ویرلمش ونهایت باشدن آیاه قدر بالجمله اعضا واجهزهیه مخصوص خسته نك لره یکان یکان سرد و بیان اولمشدر .

کتابک صوکلرینه طوغری تشخیص امراضه دأثر پک مهم معلومات ویرلمشدر . ابن جزله بواثرنده امراض نسائییه حقندهده تدقیقاته کیریشمش واحتیاق رحم (hysterie) خسته نك لردن بحث ایلشددر . کتابده بونلردن باشقه حمل و وضع حمله دأثرده معلومات نافعه مندرجدر . پارس کتبخانه سنده محفوظ اولان (منهاج الیابان) نه نهایتنه ، مختلف منابعدن اقتطاف ایدلمک صورتیه ؛ مؤلفک برده ترجمه حالی درج ایدلمشدر . بوراده ، ابن جزله نك بعدالاهتدا خرسیانلغه قارشى برچوق ردیه لر یازهرق تورات وانجیلک نه صورتله تحریف ایدلمش اولدقلرینی کوستردیکی وادعاسنی غیرقابل جرح برهانلره اثبات ایدرک دین احمدینک اعلاسنه چالشمش اولدینی برلسان ستایشله تذکار ایدلمکدهدر .

ابن جزله ردیه لرنده کتب مقدسه ده مذکور اولان فاراقلیط (Paraclite) دن مقصد ، حضرت محمد (ع . م) اولدینی حالده خرسیانلرک بوحقیقتی کتم ایتمکده اولدقلرینی ادعا واشاعه دن چکینامشدر . [*] ابن جزله نك تقویم الابدانی شو (Tacuim egritudinum et morborum fere omnium corporis humani cum curis eorundem. Buhu hyllyha byn geozla autore.) عنوانی التنده لاتینجهیه ترجمه ایدیلرک ۱۵۳۲ تاریخنده استرازبورغده طبع ونشر ایدلمشدر .

مدالی اعدادیسی مدیری

م . شمس الدین

اِجْتِمَاعِیَّة

برملتى سفالته سائق قوتلر وقورتاره جق اللر

بدبخت وطن ، طبیعتک بی پایان خزاں ثروتی سینۀ خفا سنده طاشیدینی حالده ، آغوشنده یشایان اولادلرینک ینۀ سفالت ایچنده

[*] تورات وانجیلک بالآخره تحریف ایدلمش اولدقلری اوروپا ارباب تنقیدی طرفلرندنده اعتراف ایدلمکدهدر . عصر اخیر اعظم علما سندن هندلی رحمة الله مرحومک آوروپالی موسیونرلره اولان مباحثاتی جامع کتاب قیمتدارده کتب مقدسه نك نه صورتله تحریف ایدلمش اولدقلرینه دأثر پک تدقیق وقطعی معلومات کافیه مندرجدر .